

2 Tesaronika

Pauru okusiwa mijẽ Tesaronika wãnà kō pè maekwerà

Imovyvya

Aã kareta Janejare'e 'Āg omotekokuwa Pauru tokusiwa mijẽ Tesaronika wãnà kō pè maekwerà. A'e taa pè Pauru ekoi remē, omotekokuwa kō ipi. A'e wãnà kō mō ojirovija Jesu rē. Oōvijã wasu rōmō wereko kupa ky'y (J.K.R. 17.1-10). A'e kō ajaire Pauru omotekokuwa jẽ wemikusiwarerã ypykwerà rupi toiko kupa. Jesu vāea rã rē omotekokuwa, aje ywete mǎ'ẽ tokuwa kupa. Ajamǎ'ẽ kee e'i tite ãmōgwerà: "Ovāema sikaepo Janerōvijã ywete!" e'i tite kupa. Āmōgwerà, " 'Janejare'e tẽ ije!' e'i rã'āgatã kupa. A'evo ojimoe'eoka rã'āgatã kupa. Janerōvijã vāe e'āve a'evotã kupa." A'evoa ojenu Pauru pè remē, okusiwa mijẽ kareta imonooka ijupe kō imotekokuwaa kō rōmō. Ma'e okusiwa: "Janejare'e āpã nojisa'āive, nomojisaokai mǎ'ẽ uve jẽ rewarã mō. A'e Janejare'e wekyi remē tẽ katu ojisatã ky'y. Aja paire tẽ Janerōvijã Jesu owyjytã yva pe wyi uu ky'y", e'i ikusiwa kareta pupe imono ijupe kō (2Tes. 2.7-8).

Pauru ojikuwa ijupe kō

1 ¹ Pauru tẽ ije. Eayvukwerà akusiwatã pejẽ. Sirasi^a epyri tui akusiwa ajupa remē. Āmō, Timoteu ve epyri tui.

Tesaronika taa wãnà Jesu koty rewarã kō atyry pè akusiwa mijẽ kareta ajupa. Janeruwasu koty rewarã kō tẽ pejẽ. Janerōvijã Jesu Kiristu koty rewarã kō teve pejẽ. Ajawyi eayvu akusiwa kareta pupe peupewarã mō ajupa.

² Janeruwasu ikō tapenereko katu okatuaya rupi nẽ. Tapepy'amopiryvypy katu teve ikō penereko ipi nẽ. Āmō, Janerōvijã Jesu Kiristu teve ikō a'evo tapenereko nẽ.

^a 1.1 Siuvanõ teve eu ijupe.

“Janejare'e pè oroporegeta peupewarà mō”, e'i mǎē

³Eretārāgwerà kō, oreroryvay pene. Aepo oromome'u Janejare'e pè ipi, orokuwa age'e ywesō pejirovija Jesu rē rewarà mō. Āwīvo ve age'e ywesō pejiau katu ojee peiko ky'y. A'evo teāmā peiko. A'evoa orokuwa rewarà mō orerory pene. ⁴Āmō taa taa wānà kō pè oroporegeta remē, penewarà oromojenu ijupe kō ipi. Janejare'e koty rewarà kō atyry kō pè oromojenu ipi. Kee oro'e imojenu ijupe kō: “Jesu noerovijai mǎe kō omojaiwe kō ipe ipi. Ajamǎē Jesu rekoa noityi jē tite kupa a'evo remē. Mǎerā ojirovija ywete jē ee kupa”, oro'e peupewarà mō ipi.

⁵Aje ywete pejirovija katu ee ipi. Noerovijai mǎe kō pemoai remē, a'evo jē peiko āmē ipi ne, a'e pejē. A'evo peiko rewarà mō kee e'i Janejare'e oupe pene omājā:

– Ere ojirovija mǎe kō ojimomorijau ipe remē, ojirovija katu jē ajamǎē ere iko kupa. I'ete apyteporo kō eremīgwai kō rōmō toiko kupa, e'i oupe pene omājā ipi.

⁶⁻⁸Janejare'e wekoa rupi katu ekoi ipi. Ikatuay wete Janejare'e iko ipi. Kāramō omuu tarà mijē Janerōvijā Jesu. Yva pe wyi ojikuwatà owyjy uu ky'y. Tata ijārarōwā rōwāe vo mǎē rupi uutà jane kō rovake ojisaoka. Wemīgwai yvapewarà kō reve uutà, ikasiay mǎe kō reve. A'evo ekoi remē temimojaiweawerà kō omomoikatà imojaiwearerà kō po pe wyi āmē ky'y. Jane ve janemomoiokatà janemoaiarà kō po pe wyi ky'y. Āmē poromoai ywete maekwerà kō ovote ojimojaiwe ywetetà ky'y. Janemoai maekwerà kō ve ojimomorijautà, jimomorijaua pupe. Jesu tē omomorijau kō ywetetà āmē ky'y. Janejare'e rē noja'ai maekwerà kō a'evotà wereko, Janerōvijā Jesu rekoa noerovijai mǎe kō. ⁹Ajawyi a'evotà kupa. Jimomorijau wasua rena pè tē sikaepo ootà kupa. Āwīvo awyje mǎerā tē āmē. Awyje mǎerā omokuipe'e kōtā Janerōvijā owyi. Okatuay wetea wyi omokuipe'e kōtā. Āmō, okasiay wetea wyi. ¹⁰Nāwīvo'āi ee oja'a katu mǎe kō, ijupewarà rā kō. A'e kō omoe'e ywetetà oōvijā wasu ovāe mijē remē. Oja'a ywetetà ee kupa. Oryvaytā oōvijā rē kupa. A'evoa rōmō tē uu tarà mijē Janerōvijā. Pejē ve a'evotà, “aje” pejē ijayvukwerà pè oromojenu pejē remē rewarà mō.

¹¹Ajawyi tē kōē jawe jawe oroporegeta Janejare'e pè peupewarà mō ipi. Kee oro'e ijupe ipi:

– Teremokasiay ikō nekoty rewarà kō ipi nē, nerekoa rupi katu toiko jē kupa ipi. Opota katu neremimota rupi oiko kupa. Nopotai nerekoa ojavy kupa ipi. Ajawyi emokasi kō jē nekasia rupi, āmē ywesō nerekoa rupi katu toiko kupa, nere ojirovija katu kupa rewarà mō. A'evo ekoi kupa remē, “I'ete apyteporo kō”, eretā ee kō nemājā, oro'e ijupe.

Aepo oro'e Janejare'e pè peupewarà mō ipi. ¹²Āmē Jesu rekoa rupi katu peiko ipi remē, āmō kō omoe'etā Janerōvijā Jesu penewarà mō, penekoa

rè omã'ê kupa remê. ãmõ, Jesu Kiristu ve pemoe'earà rômõ ekoità. Janejare'e okatuaya rupi a'evo penerekotà. Janerõvijã Jesu Kiristu ve okatuaya rupi a'evo penerekotà.

Janejare'e ãpã rewarà

2 ¹Kãramõ Janerõvijã Jesu Kiristu uu mijê remê, janemoatyta opyri tijaiko. A'evoa oromojenupa pejê, eretârãgwerà kô.^b ²Ajamã'ê oiko ãmõ kô pepyterà rupi, ãmõ rupi tè omojenu mãe kô mõ. Kee e'i tite kupa:

– Ovãema sikaepo Janerõvijã ywete! Aepo e'i Pauru kô oreupe jypy remê. Aepo jaa okusiwa teve imuroka oreupe kareta rupi, e'i tite kupa.

Aepo noro'ei ajamã'ê. Ajawyi taperovija ywe'e tite e'ã ijavyu kô. Tapejimonyi tite e'ã teve enu. ³Tapejimoripeoka e'ã tite ijupe kô, novãeive Janerõvijã rewarà mõ. Keetà rã'ĩ ovãetà remê. Jane kô ojimoãpãtã Janejare'e rè iko. Jesu werovija rã'ãga maekwerà kô a'evotà ekoi. ãmõ, noerovijai mãe kô a'evotà ekoi. A'e a'e kô ojimoãpãtã Janejare'e rè. A'evo remê si Janejare'e ãpã ojikuwatã jane kô pè. Ipojoy ai wete mã'ê tè a'e. A'e jimomorijau wasua rena kyty oo 'atã tè ojimomorijau rã mõ. ⁴A'e kee e'i rã'ãgatã jane kô moripea rômõ:

– Ije rômõ'ĩte Janejarã temimoe'e rômõ, e'i rã'ãga ywe'e titetã oupewarã mõ.

Ajawyi Janejarã rã'ãgawerã kô jimoãtãgwerã kô pè, “Temimoe'e rõwã ãwĩ”, e'i rã'ãgatã ijupewarã mõ. ãwĩvo ve Janejare'e pè tè tesõ, “Temimoe'e rõwã”, e'i rã'ãgatã teve. Ajawyi Janejare'e moe'ea retã wryy pè tè tesõ oiketã ojimoe'eoka rã'ãga ipe mijã.

– Janejare'e tè ije! e'i rã'ãgatã.

A'evo ojimoe'eoka rã'ãgatã, Janerõvijã vãe e'ãve. ⁵Aiko jê pepyri remeve itõkõ a'evoa amojenu jenupa pejê. Penearaipa põ aepo wyi? Napekuwai põ ky'y? ⁶Na'evoa'ãive ajamã'ê, nonurive Janejare'e ãpã rewarã mõ. Pekuwa ava põ nomurokarive mã'ê. A'evoa rã 'arã okwa remê tè a'evotã. ãmê tè katu ojisatã ky'y. ⁷Oiko age'e remê aiwea ojimosãi teãmã upa. Teãã rupi ojimosãi upa. Noporokapaive ajamã'ê. Ajamã'ê a'evoa pewarã mõ rõwã aepo a'e. Janejare'e ãpã nojisa'ãive, nomojisaokai mã'ê uve jê rewarã mõ. A'e Janejare'e wekyi remê tè katu ojisatã ky'y. ⁸Aja paire tè Janerõvijã Jesu owyjytã yva pe wyi uu ky'y. Okasia reny revejê owyjytã ojisa. ãmê si omomatã wãpã wayvukasiaya rupi ky'y.

⁹Keetã rã'ĩ Janejare'e ãpã, Jesu nowyjiyive remê. Ikasiaytã Satanasi kasia rupi. Mãrãnã jikuwa e'ã iteetejê oinõ rã'ãgatã, ãwisõ jane kô “aje ywete” te'i tite ee omãjã. Ipojoy ai wete mãe kô oinõ rã'ãgatã. ãjãgai rõvijã Satanasi kasia rupi tè a'evotã ekoi.^c ¹⁰ãmê ojiemavo mãe rã kô ojimoripeokatã ijupe. Iteetejê waiwererã rupi ojimoripeokatã kupa. A'e

b 2.1 1Tes. 4.15-17 c 2.9 Mat. 24.24

kō ajaire Janejare'e wemavotà ity oo, “aje” ne'i ywe'e tite ijayvu e'e pè kupa rewarà mō. Nopotai ijayvu renu kupa. Nojireko katuokari Janejare'e pè kupa. ¹¹Ajawyi Janejare'e opotatà tē imoripearà kō tomoripe kō. A'e kō jēsi “aje” te'i tite waria pè, ajawyi. ¹²A'evoa repykarà mō a'e jane kō Janejare'e wemavotà. “Aje ywete teāmā” Janejare'e ayvukwerà pè eu ipi. Ajamāē “aje” ne'i ijayvukwerà pè kupa. Ojimoane'e jē waiwererà rē kupa. Ajawyi a'e kō pirujē Janejare'e wemavotà ity oo ky'y.

“Tijajimokasi jē jaiko ipi”, e'i mǎē

¹³Na'evoi pejē ajamāē, eretārāgwerà kō. Janerōvijā ywete remiau kō tē pejē. Janejare'e pepyteporopa wemireko kō rōmō tapeiko. Jane ypy reko remeve pepyteporopa amātejē. [Penereko katu jimomorijau wasua wyi.] O'Āg rupi katu penereko ipi. Janejare'e ayvu e'eay aje ywete mǎē pè “aje” pejē rewarà mō tē a'evō penereko. Ajawyi pene orerory mǎē oromome'u Janejare'e pè ipi. ¹⁴Āwīvoa rā teāmā pemuroka okoty. Wayvu e'eay Kiristu rewarà rupi pemuroka okoty, oromojenu pejē remē. Wemireko katu rā kō rōmō pemuroka okoty. Āwitō Janerōvijā Jesu Kiristu wereko katu, āwīvo ve penereko katutā eevejē. ¹⁵Ajawyi, kee a'e pejē, eretārāgwerà kō. Tapejimokasi jē ikō ayvu aje ywete mǎē rerovijaa rē nē. Kōitokō pepyterà rupi aiko remē, poromotekokuwa amātejē ee. Āmō, kareta rupi poromotekokuwa jē ee. A'e rē ikō tapejimokasi jē peiko nē, a'e pejē.

¹⁶Janerōvijā Jesu Kiristu ikō tapemokasi ipi nē, Janeruwasi reve. Janerau mǎē tē Jesu. Okatuaya rupi janemokasi mǎē tē a'e. Nopi'ai janemokasia wyi mǎē tē a'e. Eeve jaikoa rā rē janemoja'aoka teve okatuaya rupi janerereko mǎē tē. ¹⁷A'e ikō tapepy'amokasi jē ipi nē. Ikasia rupi ivo tapeiko jē ipi. Ivo tapejē ve ipi.

“Tapeporegeta oreupewarà mō Janejare'e pè”, e'i maekwerà

3 ¹Āwitō oroporegeta Janejare'e pè peupewarà mō ipi, a'evō ve tapeporegeta ijupe oreupewarà mō ve, eretārāgwerà kō. Kee tapejē ijupe:

– Emokasi Pauru kō Jōvijā Jesu ayvukwerà tomojenu jenu erokwa. Emokasi ojapyaka ee mǎē kō, tojapyaka katu ee kupa. Nerekoa rupi toiko āmē kupa ky'y, tapejē ijupe.

Āwitō kwee remē pejapyaka katu enu, ta'evō kupa. Aepo pejē oreupewarà mō Janejare'e pè peporegeta remē ipi.

²Āmō kee tapejē:

– Terereko katu Pauru kō poromojaiwe mǎē kō wyi, tapejē Janejare'e pè ipi.

Sikuwa pirujē rōwā Jesu rē ojirovijatā mǎē kō. Āmō āmōgwerà kōrijō tē ojirovijatā ee. [Ajawyi aepo pejē Janejare'e pè peporegeta oreupewarà

mō ipi, a'e pejē.] ³Aje Janerōvijā ywete wayvukwerà rupi katu ekoi ipi. Ajawyi, aje ywete pepy'amokasità ipi. Aje nivoi mǎē rōvijā wyi pemokasità penereko katu ipi. ⁴Orokuwa oreayvu rupi peiko jē peiko ipi. Orokuwa teāmā napepoi'ai iwyi. Janerōvijā ywete orep'y'amopiryvypy katu a'evoa rē ipi.

⁵Janerōvijā ywete tapepy'amokasiay jē, āwisō kee tapejē: “Aje ywete Janejare'e remiauvay tē ije”, tapejē. Napeity ywe'e tite'ai āmē. Pejimokasiay jētā ee peiko. Āwitō Kiristu Uu remimota rupi oiko jē omānōa pe'i, āwīvo ve tapeiko nē.

Ayvukasia nijeweri mǎe kō pewarà mō

⁶Āmō tē mijē amome'utā pejē, eretārāgwerà kō. Janerōvijā Jesu Kiristu ayvukasia rupi tē kee a'e pejē. Jesu koty rewarà mō sō nijeweri iko ipi remē, noenu tari sō oreayvukwerà remē, tapejisyry ikō iwyi nē. Nivoi a'evoa ekoi rewarà mō a'evoa tapeiko. ⁷Emǎē. Pepyterà rupi oroiko remē itōkō oroposiko ywete ipi. Oreewe katu itōkō oroiko ipi. A'evoa pekuwapa. Ajawyi orereruparà mō tapeiko, a'e pejē. ⁸Ajawyi ava mō ome'e ja'umǎē mō oreupe remē itōkō, oromoepy tē katu kō tē ipi. Āmō, kō'e jawe jawe teve itōkō oroposiko wete ipi. Oreaiwa ipe remē oroposiko jē. Norerako'i pene. Orevote orema'e kō oropyy ipi. Āmē orerako'i sō pene remē, epy wete mǎē vo kuwa oroiko penovake mijā. ⁹Ajamǎē tepy e'āte kuwasi orojimi'u pepyri mijā, pemotekokuwaarà tē ore rewarà mō. Ajamǎē oropota tē ivo oreikoa mojikuwā pejē. Ajawyi tē norerako'i pene penemi'ō rē ipi. Oroposiko ywete kōrijō itōkō oroiko, orema'e rā repy rā rē, oreremi'ō rā repy ārā rē teve. Ajawyi orereruparà mō tapeiko, a'e pejē. ¹⁰Kōitokō jypy remē kee oro'e pejē: – Ava mō sō nijeweri oposiko ipi remē ikō, ja'umǎē tapeme'e e'ā ijupe ipi nē, oro'e pejē.

¹¹Ajamǎē kee e'i mǎē oroenu: “Oiko Tesaronika taa wānā kō mō, nijeweri tesō iko, Jesu koty rewarà kō teipe remē. A'e kō oo oo kōrijō oporegeta teitete rōmō āmō kō pē ipi”, e'i mǎē. [Ajawyi tē orokusiwa oreayvukasia mō ijupe kō imono aā kareta rupi.] ¹²Ajawyi a'evoa mǎe kō pē kee oro'e Janerōvijā Jesu Kiristu ayvu rupi imono. Tapeposiko ikō penemi'ō rā repy rā rē ipi nē. Pema'e rā repy rā rē teve tapeposiko. Āmō, tekoua katua rupi ikō tapeiko ipi nē. Aepo oro'e imono nijeweri mǎe kō pē, pepyterà rupiwarà kō pē.

¹³Pejē āmē, kee a'e, eretārāgwerà kō. [Jesu rekoa rupi ikō tapeiko jē nē, a'e.] Tapenerekoiva e'ā ikō ivo peikoa nē, ivo poroerekoa ve.

¹⁴Āmō, kee a'e pejē. Ava mō sō aā oreremikusiwarerā noenu tari remē, tapejimory e'ā ikō ee āmē nē. Maevo wekoa aiwererā rē ojimosiokatā ity āmē ky'y. ¹⁵Ajawyi ikatusa rupi ikō apijarerā tapemogeta ipi nē. Tapemoātāre'ā e'ā ikō ajamǎē imogeta nē. Peāpā rōwā ajamǎē. Penetārā tē. Ajawyi ikatusa rupi tapemogeta ipi.

Kareta moawyjepaa

¹⁶Maipe rupi peiko remeve ikõ Janerõvijã ywete tapepy'amopiryvypy katu ipi nẽ. Peneve ikõ toiko ipi nẽ. Manyvo peiko ipi remẽ teve, a'evo ikõ tapenereko nẽ, janepy'amokatuarà tè Janerõvijã rewarà mõ.

¹⁷Age'e ije ywete akusiwa ajupa ky'y, epo pè tè. Ije, Pauru. Apota ajimory pene eremikusiarerà rupi. Awĩvo akusiwa imoawyjepa ipi. Ajawyi age'e a'evo akusiwa ajupa.

¹⁸Janerõvijã ywete Jesu Kiristu. A'e ikõ tapenereko katu okatuaya rupi ipi nẽ.

[Awyjepa ãmẽ eremikusiarerà ky'y.]